



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka («Službeni glasnik BiH» broj 95/12 i 41/16), člana 25. Pravilnika o godišnjim finansijskim izvještajima političkih stranaka («Službeni glasnik BiH» broj 96/13, 89/16, 5/22 i 31/24) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka («Službeni glasnik BiH» broj 103/08, 5/22 i 39/25), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2022. GODINU POLITIČKE STRANKE **NOVI POČETAK**

Broj: 03-07-6-629/23
Sarajevo, 05.12.2025. godine

S A D R Ź A J

MIŠLJENJE REVIZORA.....	3
1. UVOD.....	4
2. PREDSTAVLJANJE POLITIČKE STRANKE.....	4
3. OPIS PREGLEDA I KONTROLE FINANSIJSKOG IZVJEŠTAJA	5
Predmet pregleda i kontrole.....	5
Cilj pregleda i kontrole	5
Obim pregleda i kontrole	5
4. PRETHODNE KONTROLE I REVIZIJE.....	5
5. NALAZI I PREPORUKE.....	5
5.1 NALAZI.....	5
5.2 PREPORUKE	7

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja političke stranke Novi početak za 2022. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora, održanih 2022. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i odredbama poglavlja 15 Izbornog zakona Bosne i Hercegovine, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2022. godinu, utvrđeno je da je politička stranka Novi početak prekršila odredbe člana 4. stav (1), člana 11. stav (1) i člana 12. stav (1) i (4) Zakona o finansiranju političkih stranaka.

Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka, niti na finansiranje troškova izborne kampanje suprotno odredbama člana 15.10 Izbornog zakona Bosne i Hercegovine.

1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila pregled godišnjeg finansijskog izvještaja političke stranke Novi početak za 2022. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora, održanih 2022. godine.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz korigovanog godišnjeg finansijskog izvještaja, politička stranka Novi početak se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	1.080,00	5,89
2.	Prilozi fizičkih lica (3-a)	12.500,00	68,19
3.	Prilozi pravnih lica (3-b)	0,00	0,00
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	3.600,00	19,64
7.	Prihodi iz budžeta (3-f)	1.150,00	6,27
8.	Prihodi od propagande (3-g)	0,00	0,00
I	Ukupni prihodi (1-8)	18.330,00	100,00
II	Ostali prihodi i drugo	0,00	0,00
	Izvori finansiranja (I+II)	18.330,00	100,00

U korigovanom godišnjem finansijskom izvještaju stranka je iskazala rashode u ukupnom iznosu od 3.665,60 KM.

2. PREDSTAVLJANJE POLITIČKE STRANKE

Naziv političke stranke je Novi početak. Skraćeni naziv stranke je NP.

Politička stranka Novi početak registrovana je kod Općinskog suda u Goraždu, rješenjem broj: 045-0-F1-21-000 001 od 27.07.2021. godine.

Sjedište političke stranke je u Goraždu, ulica Zaima Imamovića bb.

Lice ovlašteno za zastupanje stranke je Emir Hubjer, predsjednik stranke.

Lice ovlašteno za podnošenje finansijskih izvještaja za 2022. godinu je Sinan Ligata.

Prema podacima iz godišnjeg finansijskog izvještaja za 2022. godinu, organizacionu strukturu političke stranke Novi početak čini:

- Glavni odbor.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj političke stranke Novi početak za 2022. godinu i finansijski izvještaj za period od dana podnošenja prijave za ovjeru za izbore do dana ovjere rezultata Općih izbora, održanih 2022. godine.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona Bosne i Hercegovine. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka, te da li je troškove izborne kampanje ostvarila u okviru zakonom utvrđenog limita.

Obim pregleda i kontrole finansijskih izvještaja političke stranke Novi početak obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Pregled i kontrola finansijskih izvještaja obavlja se prvi put.

5. NALAZI I PREPORUKE

5.1 NALAZI

a) Politička stranka Novi početak prekršila je odredbe člana 4. stav (1) Zakona o finansiranju političkih stranaka¹.

U korigovanom godišnjem finansijskom izvještaju za 2022. godinu politička stranka je iskazala rashode u ukupnom iznosu od 3.665,60 KM. Uvidom u poslovne knjige stranke i Završni račun za 2022. godinu, utvrđeno je da je stranka evidentirala rashode u ukupnom iznosu od 14.171,98 KM.

Politička stranka Novi početak nije dostavila Centralnoj izbornoj komisiji Bosne i Hercegovine program utroška za 2022. godinu, pa smatramo da je finansijska sredstva utrošila bez programa utroška sredstava za 2022. godinu, čime je prekršila odredbe člana 4. stav (1) Zakona o finansiranju političkih stranaka.

b) Politička stranka je prekršila odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

Pregledom godišnjeg finansijskog izvještaja i dodatne finansijske dokumentacije, utvrđeno je da politička stranka Novi početak godišnji finansijski izvještaj za 2022. godinu nije dostavila u zakonom propisanom roku, nije vodila poslovne knjige u skladu sa računovodstvenim propisima, odnosno nije uspostavila pravilne i potpune evidencije o svojim prihodima i rashodima, te obrasce godišnjeg finansijskog izvještaja nije popunila u skladu sa odredbama Pravilnika o godišnjim finansijskim izvještajima političkih stranaka (u daljem tekstu: Pravilnik), čime je prekršila odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

(1) Politička stranka je godišnji finansijski izvještaj podnijela nakon zakonom propisanog roka i suprotno odredbama člana 3. stav (1) Pravilnika, čime je prekršila odredbe člana 12. stav (4) Zakona o finansiranju političkih stranaka.

¹ U skladu sa odredbom člana 4. stav (1) Zakona o finansiranju političkih stranaka, stranka finansijska sredstva iz člana 3. stav (1) ovog zakona može koristiti isključivo za ostvarivanje ciljeva utvrđenih svojim programom i statutom.

Uvidom u službene evidencije, utvrđeno je da je politička stranka Novi početak godišnji finansijski izvještaj za 2022. godinu podnijela u elektronskoj formi, putem aplikacije FI CIK BIH dana 09.05.2023. godine. Stranka je dana 08.05.2023. godine Centralnoj izbornoj komisiji Bosne i Hercegovine dostavila obrasce godišnjeg finansijskog izvještaja za 2022. godinu, odštampane iz aplikacije u PDF formatu i ovjerene potpisom ovlaštenog lica i pečatom političke stranke. Stranka je imala obavezu da godišnji finansijski izvještaj za 2022. godinu podnese do 31.03.2023. godine.

- (2) Politička stranka nije vodila blagajničko poslovanje i nije uspostavila evidencije o gotovinskom prometu sredstava putem blagajne.

Stranka u poslovnim knjigama nije iskazala promet blagajne, iako je uvidom u transakcijski račun stranke utvrđeno da je dana 09.05.2022. godine i 12.05.2022. godine izvršen polog članarine u ukupnom iznosu od 13.580,00 KM.

Stranka je imala obavezu da prikupljeni gotov novac evidentira putem blagajne i istu iskaže u poslovnim knjigama.

- (3) U poslovnim knjigama politička stranka nije pravilno i potpuno uspostavila evidenciju o prihodima i rashodima.

1. Politička stranka je u korigovanom godišnjem finansijskom izvještaju za 2022. godinu, koji je dostavila nakon Preliminarnog izvještaja o pregledu godišnjeg finansijskog izvještaja iskazala ukupne prihode u iznosu od 18.330,00 KM. Uvidom u poslovne knjige stranke i Završni račun, utvrđeno je da je stranka iskazala ukupne prihode u iznosu od 27.730,00 KM.

Politička stranka je u poslovnim knjigama povrat novčanog iznosa uplaćenog na ime takse za ovjeru prijave političkih subjekata za učešće na Općim izborima 2022. godine u iznosu od 13.000,00 KM evidentirala kao prihod. S obzirom da je izvršen povrat prvobitno uplaćenih sredstava u iznosu od 13.000,00 KM, politička stranka nije ostvarila prihod u navedenom iznosu.

U poslovnim knjigama nije evidentirana nenovčana donacija ostvarena korištenjem poslovnog prostora bez plaćanja zakupnine, koju je politička stranka u korigovanom finansijskom izvještaju prijavila u iznosu od 3.600,00 KM.

Politička stranka je novčane donacije fizičkih lica Emira Hubjera u iznosu od 9.700,00 KM i Mehe Dizdarevića u iznosu od 2.800,00 KM, u poslovnim knjigama pogrešno evidentirala kao članarine. Politička stranka je u korigovanom finansijskom izvještaju prijavila novčane donacije fizičkih lica na obrascu 3-a (Prilozi fizičkih lica).

2. U korigovanom godišnjem finansijskom izvještaju stranka je iskazala rashode u ukupnom iznosu od 3.665,60 KM. Uvidom u poslovne knjige stranke i Završni račun za 2022. godinu koji je podnesen Finansijsko-informatičkoj agenciji utvrđeno je da je politička stranka evidentirala troškove u ukupnom iznosu od 14.171,98 KM, a koji se sastoje od: troškova takse u iznosu od 13.000,00 KM, troškova provizije i drugih bankarskih usluga u iznosu od 65,60 KM i troškova materijala i energije u iznosu od 1.106,38 KM.

Troškovi takse u iznosu od 13.000,00 KM iskazani u poslovnim knjigama stranke i Završnom računu za 2022. godinu, a koji se odnose na ovjeru prijave političkih subjekata za učešće na Općim izborima 2022. godine, ne predstavljaju trošak. Naime, političkoj stranci je izvršen povrat novčanog iznosa uplaćenog na ime takse za ovjeru u iznosu od 13.000,00 KM.

- (4) Politička stranka u korigovanom obrascu 4.1 (Režijsko-administrativni i ostali troškovi) nije iskazala troškove materijala i energije koje je ostvarila u iznosu od 1.106,38 KM, čime je prekršila odredbe člana 21. i 22. Pravilnika.

c) Politička stranka Novi početak nije otvorila račun za finansiranje izborne kampanje.

Kao transakcijski račun koji je, u skladu sa odredbama člana 4.4 stav (1) Izbornog zakona BiH, bila obavezna otvoriti i namjenski koristiti za finansiranje izborne kampanje, stranka je prijavila redovni transakcijski račun stranke broj: 1011400077907749 kod Privredne banke d.d. Sarajevo.

Taksu za ovjeru za učešće na Općim izborima 2022. godine, politička stranka je, suprotno odredbama člana 4. stav (2) Pravilnika o prijavi i uvjetima za ovjeru političkih subjekata za učešće na Općim izborima 2022. godine («Službeni glasnik BiH» broj 27/22), umjesto sa posebnog transakcijskog računa za finansiranje izborne kampanje, uplatila sa glavnog računa stranke.

Troškovi izborne kampanje

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM² po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, politička stranka Novi početak je u svrhu izborne kampanje za Opće izbore 2022. godine mogla da potroši sredstva u iznosu od 4.555,40 KM.

Politička stranka Novi početak u godišnjem finansijskom izvještaju za 2022. godinu nije iskazala troškove propagande.

5.2 PREPORUKE

Preporučuje se političkoj stranci Novi početak da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da svake godine donosi program utroška sredstava i da finansijska sredstva troši u skladu sa programom utroška sredstava,*
- *da poslovne knjige vodi u skladu sa računovodstvenim propisima, odnosno da vodi pravilne i potpune evidencije o blagajni, prihodima i rashodima,*
- *da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka i*
- *da poštuje odredbe Izbornog zakona BiH i podzakonskog akta Centralne izborne komisije Bosne i Hercegovine, kojim se uređuje otvaranje namjenskog računa i njegovo korištenje isključivo za finansiranje izborne kampanje.*

KOMENTAR:

U ostavljenom roku, politička stranka Novi početak je dostavila korigovane obrasce 2, 3 i 4 godišnjeg finansijskog izvještaja za 2022. godinu, čime je djelimično otklonila nedostatke iz preliminarog izvještaja. Služba za reviziju je uzela u obzir korigovane obrasce koje je politička stranka dostavila i u skladu s time korigovala nalaze revizije iz preliminarog izvještaja.

Šef Odsjeka za revizijske poslove

Sanja Tošović

Šef Odsjeka za predrevizijske i administrativne poslove

Rijad Selmanović

² Član 15.10 stav 2. Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.